

Uunga siunnersuut Nioqqutissanik eqqussuineq annissuinerlu pillugit Inatsisartut inatsisaata allanngortinneqarneranik Inatsisartut inatsisaat (Nunatsinnut angalasunik nakkutilliineq kiisalu aningaasanut atoriaannarnut il.il. killiliussamik appaaneq)
(Aningaasaqarnermut Akileraartarnermullu Naalakkersuisoq)

Oqaaseqaat:

Naleqqami siunnersuut manna nalilersorsimavarput, erseqqilluinnartumillu oqaatigissavarput malugisimagatsigu aamma aningaasanut inatsisissatut siunnersuummi siunnerfiortaluttut. Naalakkersuisut oqaatsit kusanartut atorpaat: ineriartortitsineq, kiffaanngissuseq aammalu allaffissornikillisaaneq – piviusorli allarluinnaalluni: Innuttaasut kiffartuunnagit, artukkerlugit inatsisepassuarnik qineqqusaarutaanngitsunik, inuiaqatigiit nakkutiginerullugit kiisalu innuttaasunik tatiginneqarnissaa annikillisinneqartoq. Siunnersuut manna naapertorlugu inuiaat Kalaallit nunaminni timimikkut misissuiffiqineqartalnissaat, scannerneqartalnissaat aammalu nassatatik misissortinneqarsinnaalalnissaat aqqutissiorneqarpoq. Nunatsinni ataatsimoorfissatsinnik pisariaqartitsivugut. Angalasunik pasilliineq aqqutissaanngilaq. Nalunngilarpullu qanoq piviusut iliumaarnersut.

Nuummi mittarfimmut tunngatillugu innuttaasut sakkortuumik isornartorsiuisimapput. Angalasut sivisuumik utaqqisarput, kingusinaarnernik nalaataqartarlutik aammalu aaqquissuusaanerlunneq annertoq misigisarpaat. Tusagassiutitigut ataasiaannarata tusarparput angalasut amerlasuut angalanissaralui unitsinneqarsimasut, unnuisarfissaqartitsinatik. Ilaqutariit meerartallit siniffissaqaratik saperngutinneqartut. Tamanna innuttaasut pisuujunerulersinnagillu pilluarnerulersinngilaat. Inuit artukkerneqarput. Qaammatip siuliani tusarparput: Danmarkimi oqartussaasut aalajangersimasut Nunatsinni nunat akornanni ilaasunik isumannaallisaanermik misissuisarneq unitsinneqassasoq. Taasuma kingunerisaanik United USA-miit ingerlaartoq uteqqittariaqarsimalluni. Tamanna takutippaa sulit tatiginanngitsumik nagallannerup killiffeqarnera. Silagikassakkaangat, malittarisassat atortulluunniit pisuullutik angallanneq unittoortoq.

Maanna Naalakkersuisut siunnersuutigaat sulit annertunerusumik nakkutiginnittoqarnissaa. Tamatuma kingunerisaanik innuttaasut inuussutissarsiortullu akiligassinneqaqqissapput –

sivisunerusumik utaqqisarnernik, piffissamik atuinerujussuarmik aammalu naammagittarnerujussuaq piumasarineqartoq sulii annertunerulersissallugu.

Politikkikkut pingaarutilik ilanngullugu oqaatigissavara: marsip 11-ani qinersereernitsinnit Naalakkersuisutooqatigiit nunatta sumut ingerlanissaanik tikkuussinissaa utaqqisimavarput. Naleqqami periarfissiisimavugut Naalakkersuisut sulinissaannik, allaat Aningaasanut Inatsisissamut Siunnersuummumut aporfilersuinata oqallinnermut peqataavugut, Naalakkersuisooqatigiit suleqatigiissinnaanissaannut periarfissiiniarluta. Qinersinerulli ukiup affaata qaangiussimalaartoq aperisariaqarpugut. Tassa Naalakkersuisut oqaatsit kusanartorpassuit timitaliinerat? Naalakkersuisooqatigiit iluani suleqatigiinneq ima ajortigaa, isumaqatigiissutaasinnaasutuaq tassaasoq ajornarnerulersinnissaa nunatta iluani angalallanneq?

Naalakkersuisooqatigiit neriorsuutigaa:

” Sumiiffinni najugaqartuusugut tikeraallu nunanit allaneersut nunatsinni pisariinnerusumik akikinnerusumillu angalasarnissarput pingaaruteqarpoq. Attaveqaativut pitsaannerusumik ataqatigiittariaqarput.”

Tamannali malinneqanngilaq – saqqummiunneqartoq tassaavoq akerlianik: amerlanerusunik malittarisassaqaqtitsineq, innuttaasunut artukkiineq aammalu suliffeqarfinnut aporfissalersuineruneq.

Neriorsuisinnarluni akerlerluinnaanik suliaqarnerup kingunerisarpaa uppersassuseqarunnaarneq. Allaat Inatsisartuni uppersassuserput apeqqusernarsinnaalluni.

Naleqqami Kalaallit artukkerniarlugit sulineq isumaqatiginngilarput.

Kiffaanngissuseq anguneqassaaq inuiaqatigiinnik ineriartortitsinikkut, inuussutissarsiutinik pilersitsinikkut aammalu aningaasarsiornikkut tunngavinnik pitsanngorsaannikkut.

Inuit annerusumik nakkutiginninneq aqqutigalugu

kiffaanngissuseqarnerulersinneqarsinnaanngillat – innuttaasunik tatiginninneq tunngavigalugu inuiaqatigiinnik pilersitsineq aqquataavoq.

Kiffaanngissusiiaaneq siumut ingerlanerunngilaq, ersinngitsumillu akileraartarnermut qaffaaniarnertut isikkoqarluni.

Amerlavallaareerput tamakku. Eqaallisaariniarta, inuiaat kaasarfii taskiilu marserniarunnaarlugit.

Ila qaqugu taava tullinnguutissava immakkullu nunakkullu aamma taamatut kaasarfissiorusunneq.

Siunnersuut taamatut isikkoqartillugu itigartipparput Naleqqamiit.